

Vernissascha da la Litteratura 29

Dialogs litterars tranter giuven e vegl

■ (cp) **Suenter in onn senza in'edizium da la «Litteratura» cumpara quests dis la «Litteratura 29». Il tema da la revista è «Generaziuns». En il center stattan tschintg dialogs litterars.** La nova suprastanza da l'Uniun per la Litteratura Rumantscha (ULR) cun la presidenta *Chatrina Josty* ha tschertgà per la «Litteratura 29» auturs ed auturas ch'entran en in dialog litterar. Cun quest project leva l'ULR promover il barat tranter scripturs e scripturas rumantschas. La suprastanza ha organisà ils contacts tranter las personas che han s'annunziadas. Tschinch pèrs s'han chattads: *Arnold Spescha e Mevina Puorger, Rita Uffer e Pia Valär, Mevina Puorger ed Oscar Peer, Annetta Ganzoni ed Andri Peer e Rico Valär e Gian Beeli.* Ils partenaris dal «Dialog Litterar» èn sa cunvegnids libramain davart la furma da lur dialog. Il resultat da quel inscunter sin palpiri èn istorgias, pensaments, dumondas essenzialas e gieus cun plets. Mintga dialog è auter, mintga pèr maina in dialog dal tuttafatg spezial.

Generaziuns tranter glied che scriva

Tema da la «Litteratura 29» è generaziuns. Quel tema ha tschernì la suprastanza giuvna da l'ULR per stgaffir ina punt cun ils auturs e las auturas ch'èn già dapi lung temp en la societad. Nagin dals quatter suprastants ha dapli che 30 onns. Cun «Generaziuns» èn sa fatschentads auturs ed auturas da tut las etads: *Eva Riedi, Danuet Camenisch, Dumeni Capeder, Ida Pfister-Saluz, Göri Klainguti, Linard Candreia, Daniel Badraun Tuena, Benedetto Vigne, Fadrina Hofmann Estrada e Clà Biert.* Naschidas èn tranter auter

istorgias da satgados genetics, da tats e tattas or da generaziuns tranter la glied che scriva. Il lay-out modern ha fatg *Theres Jörger*.

24 differentas auturas ed auturs

En ses editorial descriva Chatrina Josty las difficultads en la fasa preparativa da la «Litteratura 29». Curt avant la fin da redacziun eran rivads be paucs texts tar ils respunsabels da la ULR. «Na scriva lura nagin per la Litteratura 29? Stuain nus publitgar paginas vidas tar il tema generaziuns?», sa veva dumandada la suprastanza. Plaun a plaun è pero rivà in text

suenter l'auter uschè ch'en venderdi saira a las 20.00 po vegnir preschentada la «Litteratura 29» sco ovra da 24 differentas auturas ed auturs. Tranter quels sa rechatan er *Ursin Lutz* e *Silvana Derungs* che han fatg recensius. Ursin Lutz ha prendì sut la marella «Settembrini» da *Leo Tuor* e «Da Trantertemp» da *Benedetto Vigne*. Silvana Derungs è sa deditgada a «Il temp delle Tschereschas» dad *Ursicin G. G. Derungs*. La vernissascha da la «Litteratura 29» è venderdi, ils 7 da november, a l'avertura dals «Dis da litteratura» en la sala polyvalenta Tircal a Domat.

